



烏膽石

無佬久以前，無佬遠的所在，臺灣的東海岸，有誠濟囡仔歇熱嘛足無閒的。逐工除了浸佇海裡，黏佇海岸，就親像是野馬走山坪，揣山頂好食好耍的物件。

日頭大大大，海風吹袂煞，公路邊兩片的枇杷樹葉仔闊闊闊、密密密，草仔曝甲焦焦焦，雞仔鳥仔，透早起來叫一站仔，就熱甲吼袂出聲。空氣是鹹的，風是恬的，身軀是黏的。囡仔人就規氣莫穿衫，放身軀的排骨仔隊，頭殼的金光槌恰日頭相對，曝甲烏金仔烏金，袂輸這箍圍的海邊仔才有的烏膽石。除了喙齒白白，就睇彼兩粒目睷大大蕊，像太平洋的海面光光燦燦、海水深深嬌嬌。

烏膽石的囡仔，誠實有一項烏膽石的工課。

「緊，緊，緊！利理，來去趁讀冊錢喔！跤手慢鈍，會袂赴市喔！」同伴咧喝的聲就若像佇曠闊的大海寔水螺，較遠嘛聽有。

利理的名是個阿爸號的。伊出世的時，個阿爸聽著囡仔的吼聲，擰頭感謝天，頡頭感謝地，越頭看著壁角一桶伊自細漢拈的烏膽石，就共伊的寶貝仔囡，號做利理烏膽石，向望伊會當像烏膽石全款，經過海湧的艱難，磨出特別的光焱，向望伊毋管行到佢，攏會想著故鄉海湧的聲。

秀姑巒溪口有大大粒若玉仔的石頭，太魯閣有出名的大理石，東海岸干焦這搭有烏膽石。講嘛奇，今年歇熱，有生理人，來庄頭講欲用錢收烏膽石。一陣囡仔，攏走去拈烏膽石來賣，通鬥塌冊錢。拈甲差不多的時，囡仔人就開始耍囉！

「咱共烏膽石疊做尖塔，佇上尖的所在，園一粒海螺仔殼，看啥物人揀著彼粒海螺仔殼，逐家就愛予伊一粒烏膽石。」

「袂當偷食步喔。」

五六个囡仔，十幾蕊目睷，斟酌咧相彼粒海螺仔殼。有人擲無著的時，邊仔的人就大聲拍嘆仔。

日頭猶是大大大，烏膽石這擺恰個耍煞，就會予人載去都市過生活。伊敢會想起故鄉日頭曝海岸，海風吹山坪？伊敢會聽著海湧的聲？

作者：王秀容

☆詞彙學習☆

【一站仔】tsit-tsām-á：一陣子。

【吼】háu：鳥獸啼叫。

【恬】tiām：沉靜、無聲。

【慢鈍】bān-tùn：笨拙緩慢。

【袂赴市】bē-hù-tshī/buē-hù-tshī：時間短暫，無法趕上或顧及。

【寔水螺】tân-tsuí-lê：指拉警報。

【頡頭】tām-thâu：又唸作 tìm-thâu。點頭。頭上下微動，以表示允諾、贊許、領會等意思。

【塌】thap：又唸作 lap。補足，把不足的補上。

【揀】kiat：砸。用力丟擲。